

皇清經解續編

皇清經解集編

皇清經解續編卷百六十八

南菁書院

周官說補一

武進莊存與方耕著

天官

大宰

大宰若漢丞相

小宰

小宰若漢光祿勳

宮正上士二人

宮正宮伯佐小宰治宮中之令上士二人職在王宮常日得

休沐相代下二職同

膳夫

庖人以下四官屬膳夫腊人亦宜以文屬焉

庖人中士四人

共王之膳羞及祭祀之好羞賓客之禽獻四人分職則事治

甸師下士二人

一在王藉一在膳府徒三百人不獨耕耨王藉以薪蒸役外
內饗之事故也獸人以下四官屬甸師

醫師上士二人

一御於王一治其事相代食醫以下四官屬醫師

酒正中士四人

如庖人解酒人屬酒正漿人以下七官皆以文屬焉

宮人中士四人

兩兩相代故四人掌舍以下三官屬宮人

掌舍下士四人

從王者亦相代司士敘之

掌次

自膳夫至掌次如漢少府屬矣然大府司會皆得稽攷之也

大府下大夫二人

一受賄一受貨玉府以下三官屬大府玉府卽少府長矣

玉府上士二人

如宮正解

司會

司書以下四官屬司會司裘掌皮以文屬焉耳

內宰

解如宮正宮伯內小臣以下十八官皆屬內宰其士人奄人正屬也婦官則以文屬焉耳

寺人王之正內五人

鄭註正內路寢案燕寢也路寢掌於大僕若以爲寺人在此則燕寢反無寺人矣

女史

劉中義曰女史非有道藝而知禮者不可以爲之鄭氏以爲女奴曉書者非也蓋擇嬪御之賢者爲之與案必非嬪御爲之

以八柄詔王馭羣臣

大宰

詔若今之題奏矣

以九賦斂財賄

注元謂賦口率出泉也案九賦非口率出泉之謂卽九職所出之賦也邦中之賦一同之田賦四郊之賦三同邦甸十二同家稍二十同邦縣二十八同邦都三十六同

七曰芻秣之式

前谿陳氏集說曰既有芻秣之式則委人軍旅其其委積薪芻凡疏材亦有灋式九式雖不及之而實不外於九式矣蓋周以井田制軍賦居者有積倉行者有裹糧人人自備官府不與知焉案十萬之師饋餉者七十萬家

三曰器貢

器貢謂如魯壺之屬昭十五年左傳樽以魯壺所謂薦彝器于王者是也

以九兩繫邦國之民

傳曰天子建國諸侯立家卿置側室大夫有貳宗士有隸子弟庶人工商各有分親此所以相維相繫而生養遂爭奪息倫理明也

凡邦之小治則冢宰聽之待四方賓客之小治合於法則行不合於法則止

聽其致事而詔王廢置

國人皆曰不可而見不可焉則廢之

掌建邦之宮刑

小宰

宮刑卽大司寇官刑

以聽王命

不曰聽冢宰之命

凡獻征入於王府

獻人

注鄭司農云獻征漁者之租稅案獸人獻人鼈人此三官者

掌王郊百里之內田漁之地其用之餘任民取之此之謂澤

梁無禁漁有征者卽獻人所以其上用非漁者之租稅也

掌取互物

鼈人

注互物謂有甲蒟胡龜鼈之屬蒟博雅當也本應作蒟說文

相當也不應从甘从兩

以役世婦

酒人

爲下文諸內官之綱

加邊之實 菱芡 棗脯

四邊之共 惟棗與饋食複

加豆之實 深蒲醢醢 筍菹魚醢

四豆之實 醢醢魚醢複

凡王之好賜共其貨賄

玉府

好賜兼外內言之也

凡王及冢宰之好賜予則共之

內府

注冢宰待四方賓客之小治或有所善亦賜予之案其足用
長財善物者賞之卽冢宰之好賜予也四方賓客無所私交
焉

掌邦布之入出以共百物而待邦之用

外府

此卽今採買是也

掌王后之命

內小臣

注或言王后或言后通耳案繫於王則莫非王之事雖有命必稟於王无攸遂之義也注不知此義邪

及女宮之戒令

寺人

注女宮刑女之在宮中者案此說恐非王明齋辨論女宮之處似優

掌內外之通令

內豎

注內后六宮外卿大夫也案此據王之北宮內外不得闕卿

大夫

掌弔臨于卿大夫之喪

世婦

必貴戚之卿大夫也

喪縫棺飾焉

注喪大記曰飾棺君龍帷三池振容黼荒火三列黻三列素
錦楮加僞荒纁紐六齊五采五貝黼翬二黻翬二畫翬二皆
戴圭魚躍拂池君纁戴六纁披六此諸侯禮也載匱之車以
竹爲蓋垂三面簷謂之三池簷上畫雉翟謂之振容又畫火
黼黻於蒙蓋之上別爲素錦幄以覆棺覆訖乃加蓋以畫龍
之帷帷之左右各綴三纁組繫連帷蓋之中央置五采繒繒
上飾貝其簷與帷相次之處尙有空缺懸銅魚於中謂之魚
躍拂池六翬又所以掩映帷蓋也六戴六披又所以維持帷

蓋也與今之喪束棺罩亦約畧相似

夏采掌大喪

掌下當有闕文染人掌染絲帛夏采掌染羽爲揄狄闕狄二官皆無工當在冬官鍾氏職此特出入之法耳

地官

鄉老二鄉則公一人鄉大夫每鄉卿一人

三公六卿皆兼職

封人中士四人下士八人

奉使及治事

牧人下士六人

牧六牲分職

牛人中士二人下士四人

有共牲有任器

載師上士二人中士四人

分左右

舂人奄二人女舂扈二人奚五人

王明齋謂奚五人本管領刑女爲舂扈之事者也然則饔以奉宗廟令奚自爲之故四十人邪

饔人奄二人女饔八人奚四十人

注鄭司農云饔人主炊官也特牲饋食禮曰主婦親饔爨案以此禮觀之則不用女奴審矣

乃頒比灋於六鄉之大夫至大比則受邦國之比要小司徒

鄉則彌詳邦國則要

乃會萬民之卒伍而用之至以令貢賦

此治人之法

乃均土地以稽其人民而周知其數至惟田與追胥竭作

此以地治人之法

乃經土地而井牧其田野至凡稅斂之事

此治地之法比閭族黨以五起數者寄相保相受之令所以稽民數也五甸縣都以四起數者所以攷廣袤量徑輪以知地數也溝洫澮川所以稽溝澮徑涂之多寡因以作民而治之也 注通率二而當一是之謂井牧案天下之地衍沃隰皋爲多舉井牧以概之耳若謂通率二而當一則上七則又

何以爲善邪

及大比六鄉四郊之吏平教治正政事攷夫屋及其眾寡六畜兵器以待政令

小司徒之於六鄉四郊若小宰之於王宮也皆身親履行之矣重本故也前曰車輦此曰兵器互相備注四郊之吏吏在四郊之內主民事者按四郊六遂之吏也

辨其老幼貴賤廢疾馬牛之物

鄉師

又申舉馬牛二者

以歲時巡國及野而賙萬民之囏阨以王命施惠

以鄉師統野如身使臂民知其上之惠也

比其吉凶二服

至

鄉其吉凶禮樂之器

其如字

正月之吉受敎灋於司徒

鄉大夫

敎灋一曰比居二曰任職三曰立敎四曰制刑五曰秩敘六曰簡稽七曰井牧以稽人民授田里敎稼穡使居則相保作則相助以興其賢能而禁其奇衰於是乎敎成焉

以歲時登其夫家之眾寡辨其可任者

至皆征之

此謂力征也軍賦無過家一人不皆征也古征有三無口率出泉鄭君非也

鄉老及鄉大夫帥其吏與其眾寡以禮禮賓之

眾寡鄉之士及其民

馬端臨曰古之稱賢能者皆不求聞達之士而後世之干薦